

quelli à sottoscrito a la Liga et acordo con Milan e chi no. Scrive l' Imperador era a Vormes; feva una Dieta imperial, dove conveniva prelati e terre franche, per aver subsidio contra il ducha di Geler, el qual li ha dato in questi zorni certa rota.

- 306 *Di Constantinopoli, di sier Lunardo Zustinian baylo, di 27 Dezembrio do, et 4 Zener e di 10, data 20 mia apresso Bursa.* Il sumario è questo, Come il signor Selim, che domina, qual era in Bursa, mandò 2000 cavali contra il fratello in l' Amasia, li qual per il gran fredo sono strupati e malmenati. El qual Achmat suo fratello, che in Amasia domina, si dize à aiuto di Soffi, et li vien trenta milia in suo soccorso. El signor à mandà a tuor a Constantinopoli nel chasandar 300 milia ducati in oro, et nel chasandar di fuora 400 milia ducati di aspri, et li ducati 120 milia trovati, fo di Mustafà Bassà. *Item*, ha mandato Capizi bassà, con 15 galie et 15 fuste a le Zoie contra Cureut, l' altro suo fratello: et nara, per le ultime, dito capitano averlo asediato in certa terra, *unde* il Signor andava a quella volta. El qual Signor ha fato amazar 5 soi nepoti, erano venuti da lui. Scrive, el va li a Bursa dal Signor etc. Et si ha auto nova per letere di 10, el bassà Achmat esser morto di morte subitana; e altre particolarità, *ut in litteris.*

*Di Spagna, fo leto letere del Badoer orator nostro, di 9, da Valiadolit.*

- 306\* Fu posto, poi leto le letere, queste parte. La prima per il Serenissimo, consieri, do Cai di XL e savii, che li debitori tutti, excepto quelli è ai governadori e al sal, per le angarie possano pagar i loro debiti in questo modo; uno terzo in termine di zorni 10, e uno terzo poi di là 4 mexi, e uno terzo altri 4 mexi, e non pagando le rate, pagino 10 per 100 di più, *ut in parte.* A l' incontro, sier Piero Loredan qu. sier Alvise Cao di XL, vol la parte, con questo si pagi uno quarto, *ut in ea.* Et andò le parte, 40 dil Serenissimo, et 120 dil Cao di XL, e fu presa. La copia sarà qui avanti.

Fu posto, per sier Antonio Grimani procurator, sier Zacaria Dolfin savii dil Conseio, e sier Gasparo Malipiero savio a terra ferma, che quelli hanno pagà i loro debiti a le Cazude con il terzo di Monte novo, sia taia quel pagamento quanto aspeta al Monte novo. Sier Antonio Zustinian dottor savio dil Conseio, sier Marin Zorzi dottor, sier Nicolò Bernardo e sier Alvise Pixani savii a terra ferma, vol la parte, con questo non si pagi più *de cætero.* Parlò sier Antonio Grimani; poi sier Antonio Condolmer fo savio a terra ferma; contra una e l' altra parte poi sier Alvise Pi-

xani per la soa opinion, e sier Piero Loredan Cao di XL, messe si andasse drio pagando come è stà fato. Andò le tre opinion; *tandem* fu presa quella dil Cao di XL.

E nota: è *indirecte* contra la parte hora presa, perchè è meglio a li debitori pagar di Monte novo el terzo, ch' è la prima parte.

Fu posto, per li savii, che li creditori di la tanxa numero X a restituir, possi scontar con le angarie loro e di altri passate, et ch' è a venir, *ut in parte.* Fu presa, la copia sarà qui avanti.

Fu posto, per li savii, che il sal, che per parte presa dil 15 si vendeva p. 8 al quartaruol in questa terra, *de cætero* si vendi *solum* p. 4, come si feva prima. Et fu presa.

Fu posto, per li savii tutti, che li zudei di Candia pagino ducati 200, et quelli di Corfù 1000, *ut in parte*: li qual danari siano ubligati armar galie. Fu presa.

Fu posto, per li savii, che sier Faustlin Barbo e sier Zuan Antonio Venier synici di terra ferma, atento è stati assa' fuora con spesa de ducati 100 al mexe, che stagino ancora per tuta questa setimana fuora, et poi vengano a ripatriar. Fo presa con gran vergogna di synici. Ancora non è stati sul Polesene, Padoa, padoana, Civald de Bellun, ni Felire, ni la Patria dil Friul e l' Histria, e verano a casa.

Fu posto, per li savii, excepto sier Antonio Trun procurator, che le raxon di sier Thomà Moro e sier Hironimo da Canal stati sopracomiti in Po, siano viste le loro raxon per i tre savii e levà il suo mandato, *maxime* hessendo stati presi a Lignago da francesi; e il simile a sier Zuan Mudazo e altri sora-comiti stati in Po: et il Doxe si levò, e non fo balotata dita parte.

Fu posto, prima per . . . . . che tutti li scrivani, massari e fanti di le Cazude, che hanno salario per ducati 700 a l' anno, siano privi, e dito salario posto a l'arsenal per canevi. Fu presa.

#### *Exemplum.*

*Die XVII Februarii 1513. In Rogatis.* 307

A tutti è noto quanta sia la necessità et urgentissimo bisogno del danaro per le presente occurrentie: il che ne astrenze ad fare tutte le provision possibile. *Unde*, essendo molti creditori de la meza tanxa numero X ad restituire, i quali *de brevi* se conengono satisfar, e desiderando la Signoria nostra accomodarse de i danari del sal obligati ad tal restitution,